

漢學と國士館大學

國士館大學最終講義

廣野 行甫

⑧ 孔子曰。君子有三畏。畏天命。畏大人。畏聖人之言。

畏者。嚴憚之意也。天命者。天所賦之正理也。知其可畏。則其戒謹恐懼。自有不能已者。而付畀之重。可以不失矣。大人。聖言。皆天命所當畏。知畏天命。則不得不畏之矣。小人不知天命。而不畏也。狎大人。侮聖人之言。侮。戲玩也。不知天命。故不識義理。而無所忌憚如此。○尹氏曰。三畏者。修己之誠。當然也。小人不務修身誠己。則何畏之有。

⑨ 孔子曰。生而知之者。上也。學而知之者。次也。困而學之。又其次也。困而不學。民斯爲下矣。

困。謂有所不通。言人之氣質不同。大約有此四等。○楊氏曰。生知學知。以至困學。雖其質不同。然及其知之。一也。故君子惟學之爲貴。困而不學。然後爲下。

⑩ 孔子曰。君子有九思。視思明。聽思聰。色思溫。貌思

恭。言思忠。事思敬。疑思問。忿思難。見得思義。

難。去聲。○視無

所蔽。則明無不見。聽無所壅。則聰無不聞。色。見於面者。貌。舉身而言。思問。則疑不蓄。思難。則忿必懲。思義。則得不苟。○程子曰。九思各專其一。謝氏曰。未至於從容中道。無時而不自省察也。雖有不存焉者寡矣。此之謂思誠。